

粵海關志

粵海關志卷三十

雜識

臣謹案夏禹定高山大川伯益類草木別水土而山海經作焉自是伊尹有朝獻之令周書有王會之篇露犬紈牛乘黃茲白四海異物粲然畢陳蓋學者辨物既於此廣見聞而王者大同亦因之規漸被後王德薄不能及遠魏晉六朝疆分南北尙不能攬中原之全況在海外哉夷考厯代經籍漢書藝文志有海中日月葦虹雉

占及海中二十八宿國分與五星順逆等六家
但言天象不及地輿至隋志始有交州以南外
國傳臨海水土物志唐志有顧愔新羅國記達
奚通海南諸番行記豈鉛槧之無人實獠狂之
未開耳我

朝混一車書冠帶之倫納費奉琛載於

皇清職貢圖者不可悉數又自通商互市帆檣輻輳
日異月增番客估師儕於編戶故晦明風雨可
測而知巨漕重溟按程可肩背揚雄把弱茹蕭

油素以紀別國方言誠以扶輿磅礴非博識不能該則搜錄舊聞亦識海驗風之一助云若夫
真臘風土紀及禽魚桂海虞衡偏詳草木其細
已甚概無取焉

海中雜占

朝看東南黑勢急午前兩暮看西北黑半夜看

風雨

廣輿圖

右占天

早起天頂無雲日出漸明暮看西邊無窮明日

清明 遊絲天外飛久晴便可期清朝起海雲
風雨霎時辰 風靜鬱蒸熱雲雷必震烈東風
雲過西雨下不移時 東南卯沒雲雨下巳時
辰雲起南山暗風雨辰時見日出卯遇雲無雨
必天陰 雲隨風雨疾風雨霎時息迎雲對風
行風雨轉時辰 日沒黑雲接風雨不可說雲
布滿山低連宵雨亂飛 雲從龍門起颶風連
急雨西北黑雲生雷雨必聲雷雲勢若魚鱗來
朝風不輕 雲鈎午後排風色爲人猜夏雲鈎

內出秋風鈎背來 曉雲東不慮夜雨愁過西
雨陣雨雙煎大颶連天惡惡雲半開閉大颶隨
風至風息始靜然 亂雲天半繞風雨來多少
風送雨傾盤雲過都暗了 紅雲日出生勸君
莫出行紅雲日沒起晴明不可許

廣輿圖

右占雲

秋冬東南起雨下不相逢春夏西北風夏來雨
不從 訊頭風不長訊後風雨毒春夏東南風
不必問天公秋冬西北風天光晴可喜 長夏

風勢輕舟船最可行深秋風勢動風勢浪未靜
夏風連夜傾不盡便晴明 雨過東風至晚來
越添巨風雨潮相攻颶風難將避 初三須有
颶初四還可懼望日二十三颶風君可畏 七
八必有風訊頭有風至春雪百二旬有風君須
記 二月風雨多出門還可記 初八及十三
十九二十一一作二 三月十八兩四月十八
至風雨帶來潮傍船人難避 端午訊頭風二
九君還記西北風大狂回南必亂地 六月十

一二彭祖連天忌七月上旬來爭秋莫船開八

月半旬時隨潮不可移

廣輿圖

逐月定日惡風 正月初十二十一日乃大將

軍降日逢大殺午後有風無風則雨 二月初

三十七二十七日午後有大風雨 三月初九

十二二十四日有大風雨 四月初八十九二

十三日午時有大風雨 五月初十十一十九

日申酉時有大風雨 六月十九二十七卯

辰有大風雨 七月初七初九十五二十七

有大風 八月初三初八十七二十七有大

風 九月十一十五十七十九日有惡風雨

十月十五十八十九二十七日府君朝上帝卯

時有大風雨 十一月初一初三十九日有大

風雨 十二月初二初三初五初六十二二十

八日有大狂風

東西
洋考

南海夏秋間或雲物慘然則其暈如虹長六十

尺比候則颶風必發故呼爲颶母忽見有雲霞

則颶風不能作矣舟人常以爲候豫爲備之表

異錄

南海多颶風颶者具四方之風也或曰懼風言
怖懼也初則自東而北而西而南乃止未至時
三日鷄犬爲之不安旣大至則林宇悉拔覆舟
殺稼俗有朝三晚七晝不過一之諺亦頗驗云

圖書
編

右占風

烏雲接日雨卽傾滴雲下日光晴朗無妨 早
間日珥狂風卽起申後日珥明日有雨一珥單

日雨珥雙起 午前日暈風起此方午後日暈
風勢須防暈開門處風色不狂早白暮赤飛沙
走石日沒暗紅無雨必風 朝日烘天晴風必
揚朝日燭地細雨必至 暮光燭天日光精彩
久晴可待日光早出晴明必久返照黃光明日
風狂午後雲遮夜雨霽霑

廣輿圖

右占日

虹下雨雷晴明可期斷虹晚見不明天變斷虹

早掛有風不怕

廣輿圖

右占虹

曉霧卽收晴天可求霧收不起細雨不止 三

日霧蒙必起狂風白虹下降惡霧必散

廣輿圖

右占霧

電光西南明日炎炎電光西北雨下連宿 辰

閃電飛大颶可期遠來無慮遲則有危 電光

亂明無風雨晴 夏風電下來秋風對電起

閃爍星光星下風狂

廣輿圖

右占電

蠓蛄放洋大颶難當兩日不至三日無妨滿海
荒浪雨驟風狂大海無慮至近無妨 金銀徧
海風雨立待海泛沙塵大颶難禁若近山岸仔
細思尋 烏鰂弄波風雨必起二日不來三日
難抵 水上鵝毛風大難拋東風可守回南暫
傲 白蝦弄波風起便和 廣輿圖

右占海

每月初一三十日初二三四五六日水醒至初
七平交十五水又醒至十六十七十八十九二

十日水俱醒二十一日水平如前水醒流勢甚
緊凡船到七州洋及外羅洋值此數日斟酌船
身不可偏東宜扯過西至初八九十一二三四
水退流東二十三四五六七八水俱退東船到
七州洋及外羅值此數日斟酌船身不可偏西
西則無水宜扯過東

東西
洋考

右水醒

凡行船可探西水色青多見拜浪魚貪東則水
色黑色青有大朽木深流及鴨鳥聲見如白鳥

尾帶箭此係正針足近外羅對開貪東七更船
便是萬里石塘內有一紅石山不高如看見船
身低下若見石頭可防水痕忌日忌行船裝載
大月初一初七十一十七二十三三十日忌小
月初三初七十二二十六日忌

東西
洋考

右水忌

月上潮漲月沒潮漲大訊潮光小訊月上 水
漲東北東南旋漫西南水回便是水落 北海
之潮終日滔滔高麗潮來一日一遭 萊州洋

水南北長落北來是長南退方覺 揚子江內
糧舟之患最怕船密大風緊急 繫定且守船
走難纜鈕定必直直至沙岸 走花落可神鬼
驚散要知可地大洪泥硬灘山一舫鐵可障
海中泥濘順拋水可黑水洋深接繳數尋
成山開處名羅鼓地磨斷宗毛筏繳可拋成山

鐵山萬丈深泉

廣輿圖

右占潮

廣州潮

廣人以潮汐爲水節或日一潮而一汐或日兩潮而兩汐皆謂之節其在番禺之都朝潮未落暮潮乘之加以終風前後相蹙海水爲之沸溢是曰沓潮一歲有之或再歲有之此則潮之變水之不得其節者也若以歲之十月自朔至於十有二日候潮朔日潮盛則明年正月必有大水二日則應二月日直其月至於十有二日皆然此亦潮之常而人罕知之蓋水之神於節者

也

粵東
筆記

瓊州潮

凡江浙之潮皆有定候獨瓊海之潮半月東流半月西流潮之大小隨長短星不繫月之盛衰亦甚異也

太平寰宇記

欽州廉州潮

嶺外錄欽州廉州日止一潮謂之小水朔望大潮謂之先水廣州記石洲

名黃山

在海中山北日

一潮山南日再潮

廣潮輯說

崖州潮

周密癸辛雜識續集廣王駐碭州

屬雷州界

改號祥

興至己卯歲二月北軍大至戰於崖山自曉至
午南北皆倦欲罷平旦潮信凡兩時卽退適此
日潮總不退北軍雖欲少退而潮勢不可止遂
死戰南軍大潰

海潮輯說

海中澳港

沿海之中上等安澳可避四面颶風者凡三十
三處曰馬蹟曰兩頭崗曰長塗曰高丁港曰沉
家門曰舟山前港曰潯江曰烈港曰定海港曰

黃岐港曰潮頭港曰梅港曰石埔港曰豬頭澳
曰海門港曰松門港曰蒼山澳曰玉環山梁澳
等澳曰楚門港曰黃花水寨曰江口水寨曰大
澳曰女兒澳中等安澳可避兩面颶風者凡一
十八處曰馬木港曰長白港曰蒲門曰觀門曰
竹齊港曰石牛港曰烏沙門曰桃花門曰海閘
門曰九山曰得溪澳曰牛欄磯曰旦門曰大陳
山曰大床頭曰鳳凰山曰南麂山曰霓澳其餘
下安等澳只可避一面颶風如三姑山衢山之

類不可勝數必不得已寄泊一宵若停久恐風
反別訊不能支矣又潭岸山灘山許山之類皆
團生無澳一面之風亦所難避可不慎乎

阿書編

東洋記

天地之大何物不容輕清之氣包涵萬類星辰
日月亦有所不及而聖人測理備至定四方製
指南分二十四篇由近之遠莫出範圍啟後世
愚蒙識萬國九州然而九州之外又有九州謹
按四方外國地方海道人物風土粗據所見聞

而畧誌之俾後之君子有所採擇朝鮮居天地之艮方聯

盛京對天津古箕子地分郡縣幅員里道朝貢經由歷代史典與圖備紀無庸勦說其南隔一洋日本國屬之對馬島順風一夜可抵明關白爲亂者是也自對馬島而南寅卯東方一帶七十二島皆日本倭奴之地而與中國通貿易者惟長崎一島長崎產乏粟菽難供食指開貿易入公家通計終歲所獲利就長崎按戶口均分

國王居長崎之東北陸程近一月地名彌敷譯
曰京受封漢朝王服中國冠裳國習中華文字
讀以倭音予奪之權軍政國事柄於上將軍王
不干預僅食俸米受山海貢獻上將軍有時朝
見而已易代爭奪不爭王而爭上將軍倭人記
載自開國以來世守爲王昔時上將軍曾篡奪
之山海產貢之物不產五穀不登陰陽不順遐
居臣位然後順若如故至今無敢妄篡者皆皆
世官世祿遵漢制以刺史千石爲名祿厚足以

養廉故少犯法卽如年僉舉一街官街官者鄉保也歲給贍養五十金事簡而閒通文藝者爲高士優以禮免以徭俗尙淨潔街衢時爲拭滌夫妻不共湯羹飲餘婢僕尙棄之富者履坐絮席貧者履坐薦席名曰毯踏棉各家計攤毯踏棉之多寡爲戶口男女衣服大領闊袖女加長以曳地畫染花卉文采褌用帛幅裏繞足著短襪以曳履男束帶以插刀髡鬚而薙頂額畱鬢髮至後枕闊寸餘向後一挽而繫結髮長者修

之女不施脂而傅粉不帶鮮花剪綵簪珥而插
玳瑁綠髮如雪日加滌洗薰灼楠沉髻挽前後
爪甲無痕惟恐納垢至於男女眉目肌理不敢
比勝中華亦非諸番所能比擬實東方精華之
氣所萃人皆覆姓其單姓者徐福配合之童男
女也徐福所居之地名曰徐家村其塚在熊指
山下其國男子年五十餘陽多痿奴者儂也故
呼之曰倭奴俗尊佛尙中國僧敬祖先時掃墓
廬得香花佳果非敬佛僧則上祖墳人輕生有

犯法者事覺向荒山割肚自殺無累他人立法
最嚴人無爭鬪語言寂寂呼僮僕鳴掌則然諾
無售買人口傭工期滿卽歸所統屬國二北對
馬島與朝鮮爲界朝鮮貢於對馬而對馬貢於
日本南薩峒馬與琉球爲界琉球貢於薩峒馬
而薩峒馬貢於日本二島之王俱聽指揮氣候
與山東江浙齊長崎與普陀東西對峙水程四
十更廈門至長崎七十二更北風從五島門進
南風從天堂門進對馬島坐向登州薩峒馬坐

向溫台地產金銀銅漆器磁器紙箋花卉染印
海產龍涎香鮑魚海參佳蔬等類薩峒馬山高
巉巖溪深水寒故刀最利兼又產馬人壯健嘉
靖間倭寇者薩峒馬是也日本原市舶永嘉因
倭之漁者十八人被風入中國奸人引之爲亂
髡鬚雜額雜以遠處土語遞相攘掠羣稱倭奴
後平回國僅十八人王正以法隨禁市舶中國
聽我往彼至今無敢來者倭載十八奇士普陀
往長崎雖東西正向直取而渡橫洋風浪巨險

諺云日本好貨五島難過廈門往長崎乘南風
見臺灣鷄籠山北至米糠洋香蕈洋再見薩
馬大山天堂方合正針糠蕈二洋者洋中水面
若糠粃水泡若蕈苗呼之爲米糠洋香蕈洋薩
峒而南爲琉球也居於乙方計水程六十八更
中山國是也習中國字人弱而國貧產銅器紙
螺甸玳瑁無可交易其衣冠人物貢由福州久
熟習見故不詳載自日本琉球而東水皆東流
莊子所謂尾洩之不知何時已而不虛也

海國
聞見

錄

東南洋記

東南諸洋自臺灣而南臺灣居辰巽方北自鷄
籠山至南沙馬崎延袤二千八百里與福興泉
漳對峙隔澎湖水程四更隔廈門水程十有一
更西面一帶沃野東面俯臨大海附近輸賦應
徭者名曰平埔土番其山重疊野番穴處難以
種數捕鹿而食薯芋爲糧不知年歲以黍熟釀
酒合歡爲年性好殺以人頗爲寶文身黑齒種

種不一晨聽鳥音以下行事吉凶男女野合成
耦迨崇禎間爲紅毛荷蘭人所據就安平大港
建礮臺城三層以防海口教習土番耕作令學
西洋文字取鹿皮以通日本役使勞瘁番不聊
生鄭芝龍昔鯨鯢海上娶倭婦翁氏生成功隨
帶數十倭奴聚泊臺灣視海外荒島不足以有
爲仍寇江浙閩粵因囑其子曰倘不可爲臺灣
有如虬髯之安及鄭成功寇鎮江敗歸阻守金
廈始謀取臺灣會荷蘭之通事何斌通夷負釣

鹿耳門知港路深淺說成功聯橋並進荷蘭嚴
守安平大港成功從鹿耳門進水漲三丈餘入
據臺灣與荷蘭相持甚久因喻之曰臺灣係我
先王所有現存倭人爲爾等所據今還我地資
貨無染荷蘭悉眾而去至康熙二十二年鄭克
塽歸順方入版圖以承天府爲臺灣府天興州
爲諸羅縣萬年州爲臺灣鳳山二縣雍正二年
分諸羅北之半線爲彰化縣鳳山沙馬崎之東
南有呂宋居巽方廈門水程七十二更北西高

山一帶遠視若鋸齒俗名宰牛坑山有土番屬
於呂宋與沙馬崎西北東南遠拱中有數島惟
一島與臺灣稍近者名曰紅頭嶼有土番居住
無舟楫往來語言不通食薯芋海族之類產沙
金臺灣曾有舟到其處呂宋大山北從宰牛坑
延繞東南昔爲大西洋千絲臘是班呀所據地
宜粟米長者五六分漳泉人耕種營運者甚盛
年輸丁票銀五六金方許居住經商惟守一隅
四方分定不許越界廣納丁票聽憑貿易東南

洋諸番惟呂宋最盛因大西洋千絲臘是班呀
番舶運銀到此交易絲紬布帛百貨盡消島番
土產雲集西洋立教建城池聚夷族地原係無
來由番今爲據轄漢人要無來由番婦者必入
其教禮天主堂用油水畫十字於印堂名曰澆
水焚父母神主老終歸天主堂挖坑土親膚而
埋富者納貲較多寡埋堂上墓內貧者埋牆外
三年一清棄骸骨於深澗所有家貲明於公堂
天主妻子作三股均分其蠱殊甚母傳女而不

傳子卽如牛皮火腿咒法縮小如沙令人食而
脹斃又有蝦蟆魚蠱之類彼能咒解從口躍出
成盤父子兄弟亦不得共寢席夜啟戶聽稽察
拭床席驗有兩溫氣者捕以買罰晨鳴鐘爲日
方許開市肆經營午鳴鐘爲夜闔市寂閉不敢
往來昏鳴鐘爲日燈燭輝煌如晝營生夜半鳴
鐘爲夜以閉市肆晝夜各以三時辰爲日爲夜
傷午捉夜禁闔地皆鬼市下接利仔厝水程十
二更至甘馬力水程二十一更二處漢人從呂

宋舟楫往彼貿易利仔反之東南隔海對峙有五島班愛惡黨宿務貓務煙網巾礁腦中國俱有洋艘往通亦係無來由族類山海所產與呂宋同如鹿麀牛皮筋脯蘇木烏木降香速香黃蠟燕窩海參等類水程必由呂宋之利仔反海而南呂宋至班愛十更至惡黨二十三更至宿務二十四更至網巾礁腦五十八更入愚罔有知識家無所蓄需中國布帛以蔽身國各有王惟謹守國土其東南又有萬老高丁機宜二國

居於已方國土人物產類相似水程呂宋至萬
老高一百七十四更至丁機宜二百一十更由
呂宋正南而視有一大山總名無來由息力大
山山之北爲蘇祿從古未奉朝貢雍正戊申六
年至閩貢獻西鄰吉里問又沿西文萊卽古婆
羅國再繞西朱葛礁喇大山之正南爲馬神其
山之廣大長短莫能度測山中人跡所不到產
野獸亦莫能名其狀蘇祿吉里問文萊三國皆
從呂宋之南分籌而朱葛礁喇必從粵南之七

州洋過崑崙茶盤向東而至朱葛礁喇一百八十八更馬神亦從茶盤噶喇巴而往水程三百四十更廈門由呂宋之蘇祿水程不過一百一十更共在一山南北遠近相去懸殊矣又隔東海一帶爲芒佳虱大山由馬神至芒佳虱水程二十七更復繞而之東卽係丁機宜東北係萬老局而蘇祿吉里問文萊朱葛礁喇總名皆爲無來由繞阿番性喜銅鉦器皿皆銅沿溪箸屋爲居俗甚陋身不離刃精於標鎗見血卽斃以

采色布帛成幅衣身經商其地往來乘莽甲小

舟駁從持利器相隨產珍珠冰片玳瑁海參燕

窩烏木降香海菜藤等類而馬神番性相似人

尤狡獪紅毛人曾據其港口欲佔其地番畏火

礮莫敢敵入山以避用毒草浸洗上流使其受

毒而自去產銅鑽胡椒檀香降香科藤荳蔻冰

片鉛錫燕窩翠羽海參等類鑽有五色金黑紅

者爲貴置之暮夜密室光能透徹投之爛泥汚

中上慢青布其光透出各番以爲首寶大如棋

子值價十萬餘兩西洋人購之爲至寶呂宋至吉里問三十九更至文萊四十二更此皆東南洋番國而朱葛礁喇馬神非從呂宋水程應入南洋各國因同蘇祿文萊南北大山是以附載東南洋俾覽者識其形勢焉

海國聞見錄

南洋記

南洋諸國以中國偏東形勢用針取向俱在丁未之間合天地包涵大西洋按二十四盤分之卽在巽巳矣就安南接聯中國而言海接廉州

山繞西北而環南直至占城形似半月名曰廣
南灣秦象郡漢交趾唐交州宋安南明交趾陸
接兩粵雲南風土人物史典備載後以淳化新
州廣義占城謂廣南因舅甥委守淳化隨據馬
龍角礮臺北隔一水與交趾礮臺爲界自淳化
而南至占城爲廣南國亦稱安南王阮姓本中
國人氏古曰南郡產金楠沉諸香鉛錫桂皮象
牙綾絹燕窩魚翅赤菜糖與交趾相類以交趾
爲東京廣南爲西京強於交趾南轄祿賴東埔

寨崑大嗎西南隣暹羅西北接緬甸栽蒔竹爲
城人善沒紅毛呷板風水不順潛入廣南灣者
國遣小舟數百人用竹筒攜細纜沒水密釘細
纜於呷板船底遠槳牽絙船以淺擱火焚而取
其輜重今紅毛呷板以不見廣南山爲戒見則
主駕舟者曰懸長國有常刑廈門至廣南由南
澳見廣之魯萬山瓊之大洲頭過七州洋取廣
南外之咕嚕囉山而至廣南計水程七十二更
交趾由七州西繞北而進廈門至交趾水程七

十四更七州洋在瓊島萬山之東南凡往南洋者必經之所中國洋艘不比西洋呷板用渾天儀量天尺較日所出刻量時辰離水分度卽知爲某處中國用羅經刻漏沙以風大小順逆較更數每更約水程六十里風大而順則倍累之潮頂風逆則減退之亦知某處心尙懷疑又應見某處遠山分別上下山形用繩駝探水深淺若干駝底帶蠟油以粘探沙泥各各配合方爲確準獨於七州大洋大洲頭而外浩浩蕩蕩無

山形標識風極順利對針亦必六七日始能渡
過而見廣南咕嚕囉外洋之外羅山方有準繩
偏東則犯萬里長沙千里石塘偏西則恐潛入
廣南灣無西風不能外出且商船非本赴廣南
者入其境以爲天送來稅物倍加均分猶若不
足比於紅毛人物兩空尙存中國大體所謂差
毫釐失千里也七州洋中有種神鳥狀似海雁
而小喙尖而紅脚短而綠尾帶一箭長二尺許
名曰箭鳥船到洋中飛而來示與人爲準呼是

則飛而去間在疑似再呼細看決疑仍飛而來
獻紙謝神則翱翔不知其所之相傳王三寶下
西洋呼鳥插箭命在洋中爲記廣南沿山海至
占城祿賴繞西而至東埔寨廈門至占城水程
一百更至東埔寨水程一百一十三更東埔寨
雖另自一國介在廣暹二國之間東貢廣南西
貢暹羅稍有不遜水陸各得並進而征之番係
白頭無來由裸體居多以布幅圍下身名曰水
幔

讀平聲

地產鉛錫象牙翠毛孔雀洋布蘇木降

香沉速諸香燕窩海菜藤自東埔寨大山繞至西南爲暹羅由暹羅沿山海而南爲斜仔六坤大咩丁噶叻彭亨山聯中國生向正南至此而止又沿海繞山之背過西與彭亨隔山而背坐爲柔佛由柔佛而西爲麻喇甲卽丁噶叻之後山也由麻喇甲而西出雲南天竺諸國之西南爲小西洋戈什噠暹羅沿山海至柔佛諸國各皆有王均受於暹羅國所轄古分羅暹二國後合爲暹羅國俗崇佛王衣文彩佛像內貼飛金

用金皿陸乘象亭象輦舟駕龍鳳分官屬曰招
諱以裸體跣足俯腰跣踞見尊貴不衣禪而圍
水幔尊敬中國理國政掌財賦城郭軒豁沿溪
樓閣羣居水多鱣魚從海口至國城溪長二千
四百里水深闊容洋舶隨流出入通黃河支流
夾岸大樹茂林猿猴采雀上下呼鳴番村錯落
田疇饒廣農時闌家棹舟耕種事畢而回無俟
鋤芸穀熟仍棹收穫而歸粟蒿長二丈許以爲
入貢土物因播秧畢而黃河水至苗隨水以長

水尺苗尺水丈苗丈無涉傷之患水退而稻熟
矣幹河入中國勢猛而急支河入西域歸東埔
寨暹羅以出海勢散而緩田疇藉以肥饒故產
米之國石可三星俗語捕鹿枝頭牽牛上樓蓋
鹿爲水漂沒攔息於樹梢溪屋爲水注浸引牛
於樓人有被虎噉鱷吞者告於番僧僧咒拘而
虎自至咒攄綿紗於水而鱷自縛剖而視之形
骸猶存有受蠱者向僧求咒則解是以俗重佛
教富者卒後葬以挖卽釋氏塔也又有一種男

女名謂尸羅蠻與人無異但目無瞳子人娶之
亦生男女夜眠魂變爲狸狗率類向水廁嗜食
糞穢將明附魄若熟睡翻覆其身魂不得附歸
女爲經紀人戲以酸柑擠汁嘆之眼淚長流而
不可忍人染痢者若不洗滌夜爲尸羅蠻舐食
化作小物入穀道而食腸腹故居遲之人以近
水搭厠便於淨滌又有一種共人共者咒法名
也刀刃不能傷王養以爲兵衛犯事應刑番僧
以咒勸化之使其自退其法方與受刑國多崇

庵相傳三寶到暹羅時番人稀少鬼崇更多與
三寶鬪法勝許居住一夜各成寺塔將明而三
寶之寺未及覆瓦視鬼之塔已成引風以側之
用頭巾頂插花代瓦幔覆今其塔尙側三寶寺
殿今朽爛椽繩猶存於屋瓦洋艘於蓬頂桅上
加一布帆以提弔船身輕快爲頭巾頂又於蓬
頭之南加一布帆以乘風力船無欹側而加快
爲插花番病每向三寶求藥無以濟施藥投之
溪令其水浴至今番店人尙以浴溪澆水爲治

病外洋諸番以漢人呼唐人因唐時始通故也
番俗死後焚而後葬爲消除罪孽又一種生前
發願死後恬問飼鳥飼魚者恬問卽捨身也恬
問鳥楔之山石之上羣鳥翱翔畢集然後內一
鳥紅嘴足先下而啄羣鳥集下頃刻僅存骸骨
收而埋之恬問魚焚化成灰和麩作塊投之溪
亦有先飼鳥後飼魚兩者皆兼之矣國造巨艦
載萬餘石求桅木於深山大樹先以咒語告求
允許方敢下斧不則樹出鮮血動手者立亡用

牛挽輦沿途番戲以悅之咒語以勸之少有不
順則拔木而自回舊地挽至厥所其靈方息產
銀鉛錫洋布沉東象牙犀角烏木蘇木冰片降
香翠毛牛角鹿筋藤蓆佳紋蓆藤黃大楓子荳
蔻燕窩海參海菜以銀荳爲幣大者重四錢中
者一錢次者五分小者二分五釐其名曰撥皆
王鑄字號法不得剪碎零用找以海螺巴廈門
至暹羅水程過七州洋見外羅山向南見玳瑁
洲鴨洲見崑崙偏西見大真嶼小真嶼轉西北

取筆架山向北至暹羅港口竹嶼一百八十八
更入港又四十更共水程二百二十八更而東
聯東埔寨僅水程一百十三更何以相去甚遠
蓋東埔寨南面之海一片盡屬爛泥故名爛泥
尾下接大橫山小橫山是以紆迴外繞而途遠
也由暹羅而南斜仔六坤宋脚皆爲暹羅屬國
大咩吉連丹丁噶叻彭亨諸國沿山相續俱由
小真嶼向西分往水程一百五六十更不等土
產鉛錫翠毛佳紋蓆燕窩海參科藤水片等類

相同惟丁噶呷胡椒甲於諸番爲美番皆無來
由族類不識義禮裸體挾刃下圍幅幔檳榔夾
煙嚼穀米和水吞貿易難容多艘而柔佛一國
山雖聯於彭亨其勢在下水程應到崑崙用未
針取茶盤轉西至柔佛計廈門水程一百七十
三更番情與上諸國相似而所產相同較之畧
美而倍多年經商可容三四舶就舟交易產沙
金國以鑄花小金錢爲幣重四五分銀幣不行
由柔佛而西麻喇甲亦係無來由族類官屬名

曰惡耶國王彷彿暹羅用漢人理國事掌財賦產
金銀西洋布犀角象牙鉛錫胡椒降香蘇木燕
窩翠毛佳文席等類金錢銀幣皆互用往西海
洋中國洋艘從未經歷到此而止廈門水程二
百六十更至於小西洋烏鬼國大西洋雖與大
塊相聯西洋呷板來往語具大小西洋記麻喇
甲南隔海對峙大山爲亞齊係紅毛人分駐凡
紅毛呷板往小西洋等處埔頭貿易必由亞齊
經過添備水米自亞齊大山生繞過東南爲萬

古屢盡處與噶喇巴隔洋對峙紅毛回大西洋
者必從此洋出然後向西南過烏鬼呷繞西至
大西洋就中國往噶喇巴而言必從崑崙茶盤
純用未針西循萬古屢山而至噶喇巴廈門計
水程二百八十更原係無來由地方爲紅毛荷
蘭所據分官屬名曰呷必丹外統下港萬丹池
問三處下港產胡椒萬丹另埔頭池問產胡椒
檀香而噶喇巴甲諸島番埔頭之盛各處船隻
聚集貿易中國大西洋小西洋白頭烏鬼無來

由島番罄珍寶物食無所不至荷蘭建城池分
埔頭中國人在彼經商耕種者甚多年給丁票
銀五六金方許居住中國人口浩盛住此地何
啻十餘萬近荷蘭亦以新唐禁革不許居住令
隨船而回茶盤一島居崑崙之南毗於萬古屢
山之東皆南洋總路水程分途處島番捕海爲
生產佳文章頂細而長者年僅足二席之用入
王家辟蟲蟻值價四五十金次者二三十金再
次十金值一二金者猶錦繡布褐之相去也

海國

聞見
錄

小西洋記

小西洋居於丙午丁未方從麻喇甲暹羅繞西
沿山而至於白頭番國人卽西域之狀絀鬚環
耳衣西洋布大領小袖纏腰裹白頭故以白頭
呼之國有二東爲小白頭西爲包社大白頭二
國北接三馬爾丹卽噶爾丹之本國也而三馬
爾丹之北鄰細密里也國而細密里也之西爲
俄羅斯國小白頭東鄰民呀國民呀人黑穿着

皆白類似白頭英圭黎荷蘭佛蘭西聚此貿易
民呀之西接天竺佛國民呀之東南遠及暹羅
民呀之南臨海民呀之北接哪嗎西藏及三馬
爾丹國屬而小白頭南入於海之地曰戈什塔
東西南三面皆臨大海外懸一島曰西崙中產
大珠戈什塔東之沿海地名有三曰網礁臘係
英圭黎埔頭曰房低者里係佛蘭西埔頭曰呢
顏八達係荷蘭埔頭西之沿海地名有二曰蘇
喇曰網買皆英圭黎埔頭其地俱係紅毛置買

所建也 包社大白頭國東鄰小白頭北與小白頭皆聯三馬爾丹西北枕裏海西鄰東多爾其西南鄰阿黎米也南臨大海 多爾其分東西二國皆回回東多爾其國不通海東鄰大白頭東北傍裏海北接惹鹿惹也西鄰西多爾其南接阿黎米也 裏海者諸國環而繞之東北細密里也西北俄羅東三馬爾丹西惹鹿惹也西南東多爾其南包社大白頭內注大海不通海棹其水惟從包社出海故爲裏海 惹鹿惹

也一國亦不通海東傍裏海西傍死海北聯俄
羅斯南接東西多爾其女人姿色美而毛髮紅
氣味臭衣着同白頭貢於包社 死海者卽黑
海源從地中北俄羅斯南西多爾其東惹鹿惹
也西民哱呻四面環繞不通大海故爲死海而
西多爾其民哱呻二國不通小西洋之海而濱
於中海之東北中海係從大西洋之海而入語
附大西洋記 阿黎米也東鄰包社大白頭北
接東西多爾其西北濱於大西洋之中海西聯

烏鬼國陸地一隅自西至西南與烏鬼之地隔對一海南臨大洋國爲多爾其所屬貢男女於多爾其爲奴婢 烏鬼國東北山與阿黎米也相聯向西南生出坤申方大洋何啻四五國之遠其盡處曰呷卽中國支山入海盡處曰表表者標也佛蘭西曰呷英圭黎曰呷皆順毛烏鬼地方是以紅毛呷板從小西洋來中國者由亞齊之北麻喇甲之南穿海過柔佛出茶盤而至崑崙自呷而東至戈什塔自戈什塔而東至亞

齊其海皆呼曰小西洋人黑白不同皆西域裝束長衫大領小袖裹頭纏腰國富庶產寶器生銀洋布丁香肉果水安息吧喇沙末油蘇合油等類以金爲幣鑽石爲寶

海國圖見錄

大西洋記

案紅毛等國居於西北辛戌乾方而鬼國自坤申而繞極西至庚酉方皆烏鬼族類之國總而名之曰大西洋地缺東南乾艮坤三方博厚相均而於巽未缺少故外生東南斷續諸國尙未

適均而又於噶喇巴萬古屢之東南另生一地
以補東南之缺案天圖分度十二月日月方行
到之度正當烏鬼地方之呷處日月行度坤巽
相對因人蹟不到尙未立名曾詢之佛蘭西人
云昔時伊國呷板曾到彼處地有土人語言不
通執其數人而去伊國王載之歸此所以地面
正四方於適均之處未均而又補之也是以西
洋人誌四方洋名以東南缺處之海洋爲小東
洋與戈什塔少西之小西洋相對以日本之洋

爲大東洋與紅毛大西洋相對 自烏鬼地方
係順毛烏鬼北與小西洋阿黎米也之山相聯
沿海生向西南坤申方而盡呷處方繞向西北
與閩年烏鬼王國爲界又於呷之東面懸海大
山係嗎里呀氏簡烏鬼一國間有舟楫通粵東
自閩年又向西北復繞出極西西方一帶皆閩
年縋毛烏鬼地方又自西復往西北與蘇麻勿
里烏鬼爲界中又一國亦名烏鬼國王西面皆
沿海接聯北面一帶陸地俱聯蘇麻勿里東與

接聯阿黎米也之順毛烏鬼爲界周圍皆屬烏鬼地方種類繁多肌骨皆黑生相不一地方廣闊難以族舉沿海亦有通舟楫貿易者各國以爭鬪攘掠爲事所掠人口活者俟紅毛經過售買爲奴死者類牲畜剖塊晒乾爲食蘇麻勿里亦係烏鬼西臨大洋北鄰彌黎呂黎惹林二國南北相聯人口稀少山林深密多產奇狀野獸彌黎呂黎惹林西臨大洋北一帶與貓喇貓里也毗聯貓喇貓哩也乃回回族類多爲海賊在

中海西海劫掠西臨大洋北一帶與紅毛隔中海對峙海從西入東自隔海之西北而東沿中海有葡萄牙是班牙佛蘭西那嗎民呷呻西多爾其而盡中海之東處阿黎米也由阿黎米也而向西直出至西洋皆貓喇貓里也中海沿邊之地南北東諸國三面夾繞惟西通外海是爲中海海產珊瑚西洋人來中國者謂中海阿黎米也之地西聯烏鬼陸地處恨不能用刀截斷卽於中海可通阿黎米也內海而出小西洋戈

什嗒至亞齊出茶盤何用繞極西極西南極東南而至噶喇巴北上茶盤遠近相去年餘之遠也 葡萄牙者澳門之祖家也東北二面地鄰是班牙西臨大洋南俯中海 是班牙者呂宋之祖家也西北臨大洋東南俯中海西鄰葡萄牙東北接佛蘭西 佛蘭西者西臨大洋北接荷蘭南鄰是班牙東接那嗎 那嗎者天主國王處也北接黃旗東沿中海而至民哖呻由民哖呻沿東南中海而至西多爾其由西多爾其

東沿中海至阿黎米也由阿黎米也向西沿中海之南貓喇貓里也之地而出西洋就民哖呻之陸地東至死海北聯那嗎民哖呻者天主之族類也此從中海東北之地而言 荷蘭者噶喇巴之祖家也西鄰佛蘭西沿佛蘭西而至西北皆臨大海北面隔海對峙英圭黎東鄰黃旗南接那嗎由荷蘭北海而至黃旗 黃旗者均係紅毛種類素未通中國近有舟楫來粵營生南接那嗎民哖呻東鄰普魯社爲界普魯社係

俄羅斯種類也北接各因西隔海與英圭黎對峙沿北海而至各因 各因者西北海之國亦係紅毛種類素未通中國西南隔一海與英圭黎對峙英圭黎一國懸三島於各因黃旗荷蘭佛蘭西四國之外海自各因沿海而東繞俄羅斯自俄羅斯而東至細密里也皆爲北海不能行舟海冰不解故爲冰海自各因而南至烏鬼諸國皆爲大西洋紅毛者西北諸番之總名淨鬚髮被帶赭毛帶青氈卷笠短衣袖緊襖而皮

履高後底畧與俄羅斯至京師者相似高準碧
眸間有與中國人相似者身長而心細巧凡製
作皆堅緻巧思精於火礮究勘天文地理俗無
納妾各國語言各別以摘帽爲禮而尊天主者
惟干絲臘是班牙葡萄牙黃旗爲最而辟之者
惟英圭黎一國產生銀哆囉呢羽毛綴嚙殘玻

璃等類

海國圖
見錄

粵海關志卷三十終

粵東省城龍藏
街業文堂承刊